

# Violenza a chasa pertutga tuttas e tuts

Entaifer l'onn 2021 hai dà stgars 4% damain cas da violenza a chasa registrads da la polizia. Il dumber da prest 200 000 cas en Svizra che l'Uffizi federal per statistica (UST) ha publictà per l'onn passà è dentant fitg aut. La gronda part dals cas registrads da violenza a chasa èn dunnas. Tant tar l'Uffizi per fatgs socials dal Grischun sco er tar la Centrala da dunnas dal Grischun supponan ins ch'il dumber dals cas zuppads saja bler pli aut.

MARTIN GABRIEL/FMR

L'Uffizi federal per statistica publictescha periodicamain las cifras da cas da violenza a chasa. Quai èn ils cas che vegnan registrads da la polizia. Il dumber dals cas zuppads supponids è per ina buna part pli aut. Ensem cun la Confederaziun ed ils auters chantuns è er il Grischun vidlonder da realisar las mesiras stipuladas en la convenziun internaziunala cunter violenza a chasa. Quella vegn numnada Convenziun dad Istanbul e vala er en Svizra dapi l'onn 2018. Questa convenziun preveda dapli mesiras da protecziun per las unfrendas, dapli lavur da prevenziun ed ina meglra persecuziun penala da la violenza a chasa.

## I cumenza tut bufatg

«Violenza a chasa po cumenzar a moda e ma-

niera fitg bufatg cun violenza psichica» declara *Sabina Altermatt*, la manadra dal post da coordinaziun per violenza a chasa en l'Uffizi per fatgs socials dal Grischun, «i cumenza per exempel cun trametter cuntinuadamain SMS u Whatsapps al partenari. Co has? Nua ès? Tge fas? Cura turnas? Tge has mangià?» A talas dumondas da controlla ed insistenza suondian savens smanatschas e lura violenza corporala. «Il pli davos stgalim d'escalaziun è il femicid che munta la mort per l'unfrenda da violenza a chasa. «L'onn passà èn tenor la statistica dal UST 23 persunas (da quai 17 dunnas) vegnidas mazadas en consequenza da violenza a chasa.

## Campagna da sensibilisaziun

Il post da coordinaziun chantunal cunter violenza a chasa discutescha actualmain da planisar ina campagna d'infurmaziun cunter la violenza a chasa. La manadra dal post Sabina

**«Jau hai gist discurrì cun ina dunna che ha ditg a mai, ch'ella saja ida en la chasa da dunnas pir suenter 14 onns.»**

Sabina Altermatt, manadra dal post da coordinaziun chantunal cunter violenza a chasa

Altermatt: «Nus vulessan sensibilisar spezialmain la generaziun giuvna davart il cumenzament da la violenza a chasa.» Tar quest cumenzament tutgia per exempel er la dependenza economica. «Sch'il partenari masculin di per exempel a sia partenaria, ch'ella na stoppia betg ir a lavurar per viver, tuna quai fitg bain. Ma la vita a cust dal partenari po metter la partenaria en ina situaziun da dependenza totala.» La dependenza possa exagerar a violenza a chasa en tut sias etappas, uschia Sabina Altermatt da l'Uffizi per fatgs socials dal Grischun. A basa da las cifras da l'onn 2021 dal UFS èn dapli che la mesadad da las persunas donnegiadas stadas dunnas.

## Dumber inuffizial nunenconuscent

Sabina Altermatt ha ditg ch'i saja grev per insargi d'ordaifer da vesair sch'ina persuna saja pertutgada da violenza a chasa. Enfin ch'i vegnia ad ina accusaziun cuzzia quai fitg ditg. «Jau hai gist discurrì cun ina dunna che ha ditg a mai, ch'ella saja ida en la chasa da dunnas pir suenter 14 onns.» Ch'i cuzza savens fitg ditg fin ch'i dat ina inquisiziun giudiziala ha era *Cathrin Rüber-Schleiss*, la presidenta da la Centrala da dunnas dal Grischun ditg. «Gist en il Grischun sco chantun rural cun sias valurs conservativas e nua che tuttas e tuts enconuschan in l'auter va quai pli ditg, fin ch'ina dunna pertutgada da violenza a chasa gughegia d'interprender pass giuridics.» Era Cathrin Rüber-Schleiss suppona che la cifra dals cas nunenconuscents saja bler pli auta che las cifras uffizialas.

## Dapli lavur da prevenziun

Tar ils giuvens creschids è il dumber dals mazaments creschì en Svizra l'onn passa da 14 sin 17. Quai è in'auta cifra che evochescha lavur da prevenziun tar las giuvnas ed ils giuvens. Per Sabina Altermatt sto quella lavur da prevenziun cumenzar en las scolas obligatoricas. «Là stuain nus intensivisar nossas activitads. Tar la lavur en las scolas ed er sin il stgalim terziar dati in grond basegn» In indizi per quai è tranter auter er, che las cifras statisticas mussan che la violenza a chasa è auta tar ils partenadis giuvens. La manadra dal post da coordinaziun chantunal cunter violenza a chasa giavischass ultra da quai ch'i dess ina retschertga complessiva tar la populaziun svizra cun ils resultats dals singuls chantuns. Quai fissi impurtant per avair respostas areguard las activitads cunter la violenza a chasa en noss chantun.

## Tge far en cas da violenza a chasa?

Sche vus u voss uffants essas pertutgads da violenza, sche vus As sentis smanatschà u sche vus As chattais en ina situaziun acuta da periclitaziun, lura clamai immediatamain la polizia (tel. 117). La polizia ha l'incumbensa da procurar per agid e protecziun.

Tschertgar sustegn professional: As adressai ad ina chasa da dunnas en vossa regiun, sche vus duvrais protecziun, alloschi u cussegliaziun. (Chasa da dunnas a Cuira 081 252 38 02). Ubain

As drizzai al post chantunal d'agid per victimas a Cuira (081 257 31 50).

Collecziunai documents da cumprova sco messadis, fotografias u attestats da medis. Quai è nizzaivel per in'eventuala procedura penala e/u da dretg civil. Tschertgai sche pussaivel ina persuna da confidenza che po garantir a vus sustegn e che prenda serius vus e che po gidar en cas d'urgenza (funtauna: DAO/Chasas da dunnas da la Svizra).

## Damain cas da violenza a chasa e tuttina memia blers

Durant l'onn 2021 hai dà en Svizra pli paucs cas da violenza a chasa ch'èn vegnids registrads da la polizia. Cun 19 341 delicts è il dumber da cas sa sminuì per 3,9% en cumparegliaziun cun l'onn dal coronavirus 2020. Quai ha l'Uffizi federal per statistica communitgà glindesdi. Ils pli blers delicts haja dà en partenadis existents (51%) ed en anteriurs partenadis (27%). La polizia ha registrà l'onn passà en tut 11 148 persunas donnegiadas. Da las persunas pertutgadas 2021 èn 51% dunnas, 24% umens e 15% minorens e minorens.